



# Պարույր Սևակ

## Հողը հայելի

Ձեզ հող թվացող այս հողը համայն  
Կարծես ինձ համար  
Դարձել է հիմա  
Անալգամից գուրկ - նո՛ր մի հայելի,  
Որին նայելիս  
Տեսնում եմ այնտեղ  
Գլխիվայր շրջված - շուռ եկած անտառ -  
Եվ ամեն մի ծառ  
Մի ծառ չէ կարծես,  
Այլ ծառ է երկո՛ւ.  
Ծառ կոչված մի գունդ հողին է բազմած,  
Իսկ արմատների կազմած այլ մի գունդ՝  
Հողի մեջ սուզված -  
Նույնքա՛ն ճյուղավոր,  
Որքան ճյուղ ունի նույն ինքը ծառը...  
Ու պարզ է թվում ամեն ինչ հիմա:  
Մի՛ հարց է, որ դեռ պարզ չէ ինձ համար.  
-Այս արմատներն են  
Խոտ ու ծառերի անդրադարձումը,  
Թե՞ արմատների անդրադարձումն են  
Խոտ ու ծառերը...

01.V.1959թ.  
Մոսկվա